

**Date – 28/01/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Tanhril nula thia chhar thattu police in chhuichhuah anih thu an puan hnuah Tanhril mipui in tualthattu bakah midang an inhnamhnawih ngei ringin nizan khan RL Peka in rellai an hal.
2. LADC Chairman vawiin hian thlan a ni ang.
3. Vawiin atangin Parliament Budget session tan a ni ang.
4. Sawrkar laipui chuan Parliament Budget Session lo awm tur pualin political party tin aiawh inhmuhkhawm nimin khan Parliament Annexe ah a ko.

<><><>

**TANHRIL PROTEST**

Marina Lalchhanchhuahi -Tanhril nula thia chhar thattu police in chhuichhuah anih thu an puan hnuah Tanhril mipui in tualthattu kum 62-mi RL Peka, nikuma thi, bakah midang an inhnamhnawih ngei ringin nizan khan RL Peka in rellai hal a ni.

Nizan khan Tanhril mipui lungawi lo pungkhawm ten RL Peka in rellai an hal-a, pawikhawihthu leh a chhungte chu Tanhril a awm tawh tura an duh thu an au rualpui bawk a ni. Mipui pungkhawn te chuan he tualthihna rapthlak takah hian mi 1 aia tam inhnamhnawih ang awm ngei a rin avangin chhui tha leh turin Home Department an phut ani.

Tanhril Branch YMA President Pu RS Lalrinsanga sawi danin Tanhril Local Council leh NGO joint meeting chuan tualthattu RL Peka nupui fanaute hi Tanhril Vengpui rawn rap leh tawh lo turin leh nizan vek khan Tanhril Vengpui chhuahsan nghal tura thuchhuah an siam nghal thu a sawi a, Marina Lalchhanchhuahi rawng taka thah a nih chunchangah hian Pu RL Peka chauh hian a ti thei ni a an hriatloh avangin ,a thurualpui midang awm an rin ngei chu rang tak a chhuichhak turin Home Department lam-te theihtawp chhuahpui turin an ngen tih a sawi bawk.

Nizan Tanhril Vengpui a tualthihna rapthlak taka tual thattu puan a nih hnua mipui lungawilohna lantir a pungkawm te chu Tanhril YMA OB,Committee member leh Police ten dan an tum a, mipui pungkawm an nasat em avangin dan theih an nilo a ni. Fire Department te chu a hmunah thleng thla nghalin, zan dar 10:20 khan Fire Tender in inrellai kang chu an thelh mit a ni. RL Peka in rellai hi Mizopa chhiar a chhawng 6 ni-in, kawngpui an hnuai chhawng 4-na atanga kang tan a ni a, chhawng 3-na tlem kang kai tel-in , in rellai- chhawng 4-na leh chhawng 5-na a kang nasa ber a ni.

Hun eng emaw chen a bo hnua nikum December ni 13- a MZU Football Playground- a a ruang an hmuh, Tanhril Vengpui nula- Marina Lalchhanchhuahi rawng taka thattu RL Peka hi Tanhril Police ten thu zawhfiah tura an koh ni , nikum December ni 16 khan an chhenna In atangin a zuangthla a, damdawiin panpui a nih hnuah a thi a ni. RL Peka hi Kolasib atanga chhungkua-a lo pem, Tanhril Vengpui-a In sa mek leh mi in luah a, a chhungte nen khawsa mek a ni tih hriat a ni.

Marina Lalchhanchhuahi tualthihna chungchanga Mizoram Police te hnuchhuina kal zel-a hmun hrang hranga CCTV/Surveillance camera awm an enfiah atangin RL Peka motor chu nikum December ni 1 khan Tanhril ah a tlan lut ngei a ni tih finfiah a ni a, tualthattu motor hi Mizoram University Campus ah darkar 2 leh minute 18 chhung a awm tih finfiah a ni bawk. Tanhril Nula ruang an chharna hmuna thisen an hmuhchhuah te leh RL Peka phone hman lai te enfiahin hnuchhuina Examination report atanga a lan danin RL Peka Tanhril Vengpui, Aizawl hi pawikhawihtu leh mawhphurtu ber tih hmuhchhuah a ni ta a ni.

Tanhril khawtlang lungawilo te punkhawmnaah thusawiin Aizawl SP Pu Zosangliana chuan he thihna chungchang hi bawhzui zel a nih thu leh inhnamhnawih dang an awm leh awmluh pawh an chhui zel dawn a ti a ni.

<><><>

**LAWNGTLAI**

Lai Autonomous District Council Chairman vawiin hian thlan a ni dawn a, United Legislature Party atangin Congress Member, South Lungpher bialtu Pu C.Lalmuanthanga'n a hming a pelut.

Larsap thu angin pro-tem chairman atana ruat Pu C. Hrangthiangan vawiina Chairman thlanna inkhawm a kaihruai dawn a, chawhma dar 10 leh a chanve-ah chairman thlan buatsaih a ni ang.

Hetihlai hian Lai Autonomous District Council Sorkar thara Chief Executive Member niturin nimin khan MNF Member Pu C.Lalsawmzuala chu laklulh a ni a.

Laklulh inkhawm hi LADC Hall ah neih niin Lawngtlai Bawrhsap Pu Donny Lalruatsanga an Pu C.Lalsawmzuala Chief Executive Member atan rinawmna thu a tiamtir a ni.

Puantawh angin nikum December 3 a LADC inthlanpui neihah Party mala Sorkarna siamthei an awmluh hnu ah MNF leh Congress chuan United Legislature Party dinin Sorkarna an siam theih thu Governor hnena an thlen hnu ah CEM atan Pu C.Lalsawmzuala hi ruat niin, vawiin khan laklulh a ni.

CEM thar Pu C.Lalsawmzuala chuan LADC ah MNF leh Congress inkawp Sorkarna a pian theih nan a Governor in a duhsakna leh thurawn a pek na ah te, Chief Minister in phurtaka hma a lakna ah te lawmthu sawiin, Lairam mipuite chibai a buk a, ULP Sorkar chu mipui Sorkar, langtlang taka hnathawh tum an nih thute, eirukna leh hlemhletna in hmun a chan a remloh tur thute a sawi a, Lairam chu Lalpan mal a sawm tlaka hruai an tum tih sawiin, finchhuah an ngaihna ah finchhuah thin turin helama a ngaihna hriate a sawm.

Chief Executive Member hian Dy CEM atan Pu Sanghuliana Mualchin bakah Executive Member atan Lalzahawma Chinzah, Pu HC Lalengkima leh Pu H, Vanlaltanpuia te an nih tur thu puangin, Sorkar fuke kim nan chanvo neitur dang chu remchang dangah la siamfel a nih tur thu a sawi.

CEM thar hian thlawptu a neih dan naktip ni 29 khian fiah a ni ang.

<><><>

**EK BHARAT SHRESTHA BHARAT**

DoNER leh North Eastern Council (NEC) bultuma programme pawimawh tak, "Ek Bharat Shreshtha Bharat" campaign - Ashtalakshmi Darshan Youth Exchange Programme Mizoram University-a buatsaiha nimin khan Chief Minister hlui Pu Zoramthanga, MNF President chu inlanin ram pawn atanga zirlai mikhual lokalte hmaah thu a sawi a, Zawnha leh chhanna hun hmanpui a ni bawl.

Vawiin thlenga neih tur Ashtalakshmi Darshan Youth Exchange Programme neih mekah hian Andaman & Nicobar Islands leh Lakshadweep atangin zirlai 20 ve ve leh faculty coordinator 2 ve ve, an vaiin mi 44 te chu MZU chuan a mikhual mek a. Hetah hian Pu Zoramthanga chu zirlaiten kawmin Mizoram chanchin pawimawh tak tak leh Mizoramin zalenna a sual atanga remna thuantling leh hlawhtling ber a neih tak dan a sawi a, zirlaite leh faculty coordinator te nen zawnha leh chhanna hun an hmang ho nghal a ni.

Youth Exchange hmanpuitu Pu Zoramthanga chuan remna thuthlung avanga Mizoramin a bika humhimna a neih hrang hrangte leh remna chungchang thu sawiin, "MNF leh India inremna, Peace Accord hlawhtling tak avanga din Mizoram University ngeiah State pawn atanga zirlaite leh zirtirtu duhawm tak takte nen inkawmhona hlu an neih theih avangin a lawm hle tih a sawi a. Mizoram Peace Accord chu India ram chanchina inremna thuthlung ziah tawha hlawhtling berte zinga mi, vawiin thlenga remna tlo leh thuantling bera chhal ngam, hunin a finfiah tawh, ram dangte pawhin an remna thuthlung atana an entawn a la ni reng a ni," a ti.

<><><>

## EDUCATION MINISTER

Mizoramah zirna tha zawk a awm theih nan leh by-heart system tihbo a nih theih nan MBSE Pawl 10 leh pawl 12 board exam result-buah Top Ten leh Division tih lan a ni tawh dawn lo.

He thu hi vawiina School Education Minister Dr. Vanlalhlana'n a pisaa thuthar thehdarhtute a kawmnaah sawiin, School Education Department in Quarterly Review Meeting wawi 6-na leh Mizoram Education Reforms Committee Meeting wawi 14-na in zirna leh zirlaite tana tha zawk tur thil tam tak a ngaihtuah hnuah MBSE Pawl 10 leh pawl 12 board exam result-buah Top Ten leh Division ti lang tawh lo turin thutlukna an siam a ti a, School hming hnuaiah zirlai pass te hming leh roll number chiah tarlan a ni tawh dawn tih sawiin, he kalphung hi CBSE, CISCE leh state tam takin an kalpui tawh a ni a, zirlai ten an mark hmuh dan kimchang chu MBSE website atangin an hmu thei vek a, Merit list leh rank certificate chu MBSE-in a diltute hnenah a pechhuak thei reng dawn tih a sawi a ni.

He hmalakna hi inelna thianghlim a nih rualin zirna tha zawk a awm theihna atana an tih a nih thu sawiin, school tam takin Board exam result tha an duh avanga pawl 9 leh pawl 11 zirlai hlamchhiah a, pawl 10 leh pawl 12 Question hlui zir a, naupangte by heart system a an kal tir thin tih bo nan leh naupangin a thluak leh a rilru a hman theih tak takna, competency based learning hmanga zirlaiten competitive exam hrang hrang NEET, JEE leh a dang te an hmachawn theih nan hetiang hian an kalpui tawh dawn tih an sawi a ni.

Hei bakah hian zau zawka zirchianna leh inrawnkhawmna an neih hnuah Pawl 1 atanga pawl 10 Academic Calendar chu January-December hmanga siam ni tawh turin thutlukna an siam a ti a. Pawl 10 exam erawh tuna neih hun pangngaiah neih chhunzawm a ni dawn a, Pawl 11 leh 12 Academic Calendar atan April-March hman a ni chhunzawm dawn bawk a, Mizorana naupangte'n mahni in lama tawng hman thlauhthla a, saptawng an hman nasat lutuk tawh avangin mahni hnam tawng humhalh a nih theih nan English Medium School-ah Home Language Day hman a ni dawn bawk a, class period karlaka chawlh ahzirlai ten in lama an tawng hman tir thin an ni dawn a ti.

Mizorama cheng ten Hindi an thiam loh em avangin thla khatah vawi khat tal Hindi Speaking Day hman a ni dawn bawk a, SCERT-in Spoken Hindi lehkhabu a ngaihtuah dawn a, Minister chuan Mizoram-a Middle leh High School-a Hindi Zirtirtu zingah Hindi a tawng thei lo an awm tih sawiin, Zirtirtute chu ban an tum lova an hlawh phu a hna an thawh theih nan leh zirlaite'n Hindi tawng an hman thiam zawk theih nan Hindi zirtirtute chu training mumal tak hmangin an tichak dawn a ti a, Hindi Speaking Day hi Hindi tawng thiam a tangkai avanga siam an nih thu sawiin, vai inchei anga inchei tura tih lam a ni lo a ti.

School Education Minister chuan Common Uniform chu zirtirtu kalkhawm association in ti tawh lo tura an nawr avang leh, mipui rawnkhawmna an neihah hmun 3 a thena hmun 2 in an duh lo tih an sawi bawk avangin chhunzawm a ni dawn lova, Supreme court thupek angin sawrkar leh aided sikul a thawk zirtirtu, kum nga aia rei la service tur te chu Teacher Eligibility Test (TET) Certificate nei tura bawhzui tum a nih thu a sawi a, pawl leh mimal tam zawkin an duh dan angin school tan hun chu dar 9 ah chhunzawm a ni dawn a ti a, heng hmalak dan tur an chhawpchuah te hian Mizorama school zingah Autonomous District Councils huamchhunga Elementary a huam tel lo tih a sawi bawk a ni.

<><><>

#### AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchintha puan leh a ni ang.

<><><>

#### PARLIAMENT

Vawiin atangin Parliament Budget session tan a ni dawn. Vawiin inkhawm tan ni ah house pahnih thukhawm hmaah President Droupadi Murmu-I chuan thu a sawi dawn a. Naktukah Economic Survey pharh a ni ang a. February ni 1 ah Union Budget pharh a ni ang.

Sawrkar laipui chuan Parliament Budget Session lo awm tur pualin political party tin aiawh inhmukhawm nimin khan Parliament Annexe ah a ko. Defence Minister Rajnath Singh chuan he inhmukhawm hi a kaihuai a. Rajya Sabha House Leader J P Nadda, Union Parliamentary Affairs minister Kiren Rijiju, Union Ministers of State for Parliamentary Affairs Arjun Ram Meghwal leh Dr L Murugan te pawh an tel a. Congress leader Jairam Ramesh, Dravida Munnetra Kazhagam Leader Tiruchi Shiva, Trinmool Congress leader Sagarika Ghose, leh Samajwadi Party MP Ramgopal Yadav te pawh hruaitu kalkhawm zingah an tel.

<><><>

INDIA EU

India leh European Union chuan vawiin khan Free Trade Agreement chhinchhiahtlak tak an ziaak. He inremna hi Prime Minister Narendra Modia leh European Council President Antonio Costa leh European Commission President Ursula von der Leyen te New Delhi-ah an inbiak hnuah inremna hi ziah a ni a. India leh EU te hian inremna chi sarih an ziaka hengte hi sumdawnna, venhimna, ralthuam, veivahna, khuarel chhiatna laka invenna leh green hydrogen lamahte inremna an ziaak a ni.

Prime Minister Narendra Modia leh European Commission President Ursula von der Leyen te chuan inremna an ziaak thei chu lawmawm an tih thu an sawi a. Thusawiin PM Modia chuan India leh EU inkara thawhdunna chu a nghet chho telh telh a ti a. Tunah hian dinhmun thar an chuangkai tih sawiin sumdawnna lama inremna mai niloin hlawkna an intawmna tur ruangam an ni a ti bawk.

<><><>

PRAGATI

Prime Minister flagship programme Pro-Active Geovernance and Timely Implemetation,PRAGATI chuan mellung pawimawh tak phunin a tum 50 na inhmuhkhawm hlawhtling takin a nei. He programme hi PM Modian kum 2015 a bul a tan atangin sawrkar inrelbawlina leh hnathawh dana inthlak danglamna tam tak a thleng a. Sawrkar hnathawhte hna thawh dan chu a hunlai ngeia vil a ni a, Prime Minister hoa thlirletna hun hman thin niin hetah hian hmasawnna ruhrel pawimawh tak tak te pawm niin mipuiten lungawilohna an thlente pawh enfiah nghal a ni a thin a. Kum 10 chhungin PRAGATI hian sawrkar thutlukna pawimawh tak takah nasa takin a pui a, hmasawnna hna thawh tikhawtlai thinte chin fel niin sawrkar hnathawhte rintlak lehzuala siam an ni.

PRAGATI hnuaia hmalakna langsar tak chu Uttar Pradesh-a 6 lane kawngpui Chakeri atanga Allahabad inkar NH-2 Section hi a ni a. He 6 len kawngpui hi tunah chuan NH-19 ah a tel tawh a. Ramchhunga inkalpawhna kawngpui pawimawh berte zinga mi a ni a. Km 145 a thui niin Union Ministry of Road Transport and Highways hnuaia hmalak a ni a. Kum 2017 khan hnathawh tur hi tihfel tawh a ni a. Kawngpui pawimawh tak anih rualin a siamna lamah harsatna chi hrang hrang a tawk a. Hna thawh zawh mai theih anih loh hnuah Prime Minister Modia hoin PRAGATI hnuaia thlirho a ni a. Hemi hnu hian harsatna te chinfel niin kum 2024 August thla khan mipuite hman theih tura hawn a ni a. Cheng vaibelchhe sang li leh 850 sengin he kawngpui siam a ni.

<><><>